



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

Periodu : Feveiru 2012

Edisaun : 13 Feveiru 2012

Tribunál Distritál Oecusse hala'ó audénsia julgamentu ba kazu violénsia doméstika durante loron tolu tutuir malu

Hahu husi loron 07- 09 Feveiru 2012, tutuir malu, Tribunál Distritál Oe-cusse hala'ó audiénsia julgamentu ba kazu ofensa ba integridade fízika simples ho natureza krime violénsia doméstika.

Bázeia ba JSMP nia observaun katak, kada loron tribunál hala'ó audiénsia julgamentu rua no kazu sira ne'e hotu ho tipu krime violénsia doméstika. Total kazu ne'ebé tribunál prosesa hamutuk kazu ne'en (6). Julgamentu ba kazu sira ne'e hala'ó iha dader no lorokraik tuir orariu ne'ebé mak ajenda tiha ona.

Kazu hirak ne'e involve arguidu ho antedente oi-oin. Maibé entre kazu ida ne'e nain ida mak involve oknum ka pesoal husi Polisia Nasionál Timór Léste (PNTL)¹, ida seluk nu'udar konsultan tekniku iha área kontrusaun sívil, ida seluk badaen no restu nu'udar comunidade bain bain ho vida agrikultor.

Entre kazu neen (6) refere konklui ho rezolusaun finál tribunál diferente. Kazu tolu ho pena multa husi \$ 21 to'o \$ 90² (Dolar Amerikanu) inklui selu kustu judisiáriu ba arguidu sira, no tolu seluk ho pena prizaun entre tinan ida fulan neen, maibé suspendidu husi tinan ida fulan neen ba tinan rua.

Julgamentu sira ne'e prezide husi juiz Singular Dr. João Ribeiro. Husi Parte Ministériu Públiku Representa husi Dr. Afonso Lopes no Jacinto Babo Soares, no husi parte defeza representa husi Dr. Sebastião Amado Nheu de Almeida no Calistro Tout husi eskritoriu Defensória Pública Regional Oe-cusse.

¹ Hare Komunikadu Imprensa konabá kazu violénsia doméstika ne'ebé involve oknum PNTL iha loron 20 fulan Feveiru 2012

² Hare Komunikadu Imprensa konaba tribunál hamonu pena multa ba arguidu kazu violénsia doméstika iha Tribunál Oe-cusse iha loron 20 fulan Feveiru 2012

Diretór Ezekutivu JSMP Luis de Oliveira Sampaio haktuir katak “*JSMP apresia teb-tebes ba esforsu tomak autór tribunál sira, tantu Juiz, Ministériu Públiku nomós Defensor Públiku ne’ebé mak kontinua maneija prioridade ba kazu violénsia doméstika sira liu husi kolaborasaun diak no prosesu ne’ebé sira hatudu hodi realiza audénsia julgamentu.*

Iha tempu hanesan JSMP mós hakarak dedika apresiasaun ba ofisial justisa sira iha tribunál distritál refere, tanbá mesmu ho rekursu pesoal ne’ebé limitadu teb-tebes, maibé nafatin hatudu sira nia vontade no espíritu dedikasaun atu prepara no ajuda juiz sira atu agenda kazu violénsia doméstika sira atu lori ba prosesu julgamentu.

Kazu sira ne’e hotu ho tipu violénsia fiziku simples, tanbá ne’e mak depois julgamentu ba produsaun provas to’o faze alegasaun finál, juiz imediatamente, analiza faktus provadus sira no konklui kedas nia prosesu inklui formula nia desizaun ba ba leitura sentensa.

JSMP mós nota katak, antes atu rona deklarasaun husi parte sira tantu arguidu, lezadu nomós testemuña sira, juiz sempre esplika konabá sira nia direitu no obrigasaun tuir lei prosesuál.

Liu-liu ba lezada, juiz esplika konabá sira nia obrigasaun atu fo deklarasaun konabá faktu kriminál relasionada ne’ebé mak akontese kontra sira. Aleinde ne’e, depois leitura sentensa, JSMP mós nota katak juiz mós sempre fo konsellu ba arguidu hodi labele repete tan nia hahalok iha futuru.

JSMP espera katak, ho esforsu kolektivu, espíritu kolaborativu no seriedade autór judisial nian inklui komponentes relevantes sira ba realizasaun justisa, bele sai hanesan pasu importante ida hodi bele diminui número violénsia doméstika iha Timór Lésté.

Atu hetan informasaun klean, favor kontaktu;

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Landline: +670 3323883